


明朝典彙




		漢書門	
九	〇	〇	〇
六	一	四	五
四	三	函	號
冊	架		類

庫文閣內		漢書	
九	〇	〇	〇
元	六	四	五
四	三	函	號
冊	架		類

內閣文庫	
番號	漢 9205
冊數	64 (57)
函號	294 39

五十七



國朝典彙卷一百六十九

豐

都察院右僉都御史臣徐學聚

編輯

廣西道監察御史臣趙胤昌

訂正

日本

洪武二年正月遣使以卽位詔諭日本諸國賜以璽書

淺草文庫

按日本古倭奴國海中諸夷倭奴最大西南至海東北
大山國主世以王爲姓羣臣亦世官地分五畿七道三
島又有附庸國百餘拘邪韓最大其國小者百里大不
過五百里戶少者千多止一二萬皆倭種也漢滅朝鮮

通使稱王者三十餘國倭王最雄長者居邪馬臺卽邪
摩維歷漢魏晉宋隋皆朝貢稍習華音唐咸亨初惡倭
名更號日本元世祖使趙良弼招之不至遣峻都范文
虎將十萬兵往征至五龍山暴風覆舟軍盡沒終元世
絕不通

倭寇山東並海郡縣又寇淮安

四月倭寇出沒海島侵掠崇明沿海諸處太倉指揮戴德
率兵出海捕之獲倭寇九十二人及其兵器海舟奏聞
陞德爲都指揮遣使祭東海之神戴一作翁

三年三月遣萊州同知趙秩持詔諭日本國王良懷曰朕

聞順天者昌逆天者亡自古帝王居中國而治四夷歷
代相承咸出斯道惟彼元君漠北虜夷竊主中國汗壤
彝倫朕荷上天祖宗之佑百神效靈諸將用命收海內
之羣雄復前代之疆宇卽皇帝位已三年矣比嘗遣使
持書飛諭四夷高麗安南占城瓜哇西洋鎖里卽能順
天奉命稱臣入貢旣而西域諸種番王各獻良馬來朝
俯伏聽命北夷遠遁沙漠將及萬里特遣征虜大將軍
率馬步八十萬出塞追獲殲厥渠魁大統已定蠢爾倭
夷出沒海濱爲寇已嘗遣問久而不答方將整飭巨舟
致討爾邦俄聞被寇者來歸始知前日之寇非王之意

國朝典彙卷一百六十九
日本
乃命有司暫停造舟之役然或外夷小邦故逆天道不自安分神人共怒天理難容征討之師控弦以待果能革心順命永保承平不亦美乎嗚呼撫順伐逆古今彝憲王其戒之以延爾嗣

四年趙秩等往日本泛海至析木崕入其境關者拒勿納秩以書達其王良懷王乃延秩入秩諭以中國威德而詔旨有責讓其不臣中國語王曰吾國雖夷狄僻在扶桑未嘗不慕中國之化而通貢奉惟蒙古以戎狄蒞華夏而以小國視我我先王曰我夷彼亦夷也乃欲臣妾我而使其使趙姓者詠我以好語初不知其覘國也既

而使者所領水犀數十艘已環列於海崕賴天地之靈一時雷霆風波漂覆幾無遺類自是不與通者數十年今天子帝華夏天使亦姓趙豈昔蒙古使者之雲仍乎亦將詠以好語而襲我也命左右將刃之秩不爲動徐曰今聖天子神聖文武明燭八表生於華夏而帝華夏非蒙古比我爲使者非蒙古使者後爾若悖逆不吾信卽先殺我則爾之禍亦不旋踵矣我朝之兵天兵也無不當百我朝之戰艦雖蒙古戈船百不當其一况天命所在人孰能違豈以我朝之以禮懷爾者與蒙古之襲爾國者比耶於是其王氣沮下堂延秩禮遇有加

即奉表箋稱臣遣其臣僧祖來隨秩入貢詔賜祖來等
文綺帛仍賜良懷大統曆及文綺羅

五年上諭劉基曰東南尚禪教姑遣明州天寧僧祖闡
南京瓦官僧無逸開諭之良懷欲畱二僧力辭王遣使
同一僧入貢

倭寇海鹽澈浦溫州又寇福建海上諸郡

六年倭寇登萊 七年寇膠州

五月日本持明與良懷爭立使者賫其國書達中書省貢
馬及方物而無表文 上命却之其臣亦遣僧貢馬茶
布刀扇 上曰此私交也亦不受令中書省移文責王

八月靖海侯吳禎捕獲倭寇人船送京師

九年日本屢寇瀕海州縣 上命中書省移文責之良懷
遣僧歸廷用等奉表貢方物謝罪賜王及使文綺有差
已而 上以所上表詞不誠復詔諭之

十二年日本來貢無表文安置使人於陝西番寺

十三年日本再貢皆無表以其征夷將軍源義滿所奉丞
相書來書倨甚命錮其使

十四年七月良懷遣僧如瑤等貢方物 上却其貢仍命
以書責之曰大明禮部尚書致意日本國王王居滄溟
之中不奉上帝之命不守已分但知環海為險限山為

固肆侮鄰邦縱民爲盜上帝將假手於人禍有日矣吾
奉至尊之命移文與王王若不審其微并觀蠡測自以
爲大無乃構隙之源乎王之國自漢魏晉宋梁隋唐宋
之君皆遣使奉表貢方物當時帝王或授以職或爵以
王由歸慕意誠故復禮厚也若叛服不常構隙中國則
必受禍如吳大帝晉慕容廆元世祖皆遣兵征伐俘獲
男女以歸千數百年間往事可鑒也王其審之
日本遣僧入貢乞還安置諸僧使 上曰日本旣謝罪還
其使召至京宴賞遣歸時日本納兵貢艘中助逆臣胡
惟庸惟庸敗事發 上乃著祖訓示後世毋與倭通

十六年四月倭寇浙東又寇金鄉平陽

十七年如瑤又來貢坐通惟庸發雲南守禦

二十六年倭寇金鄉

二十七年十月倭寇金州 二十八年四月復寇金州

建文三年九月倭寇浙東

永樂元年日本王源道義遣使入貢 上賜冠服文綺給

金印

二年日本屢寇濱海郡縣及是遣人來貢并擒獻犯邊賊
二十餘人縛致饒中丞死遣通政趙居任賜日本王冠
服文綺金銀古器書畫又給勘合百道合十年一貢每

貢正副使無過二百人若貢非期人船踰數夾帶刀鎗
並以寇論居任還不受日本餽 上喜厚賜之尋命僉
都御史俞士吉賜王印誥冊封爲日本國王詔名其國
之鎮山口壽安鎮國山 上爲文勒石銘之

四年正月對馬臺岐等島海寇劫掠居民勅道義捕之獲
渠魁以獻而盡殲其類 上嘉其勤誠遣使賞璽書褒
諭之仍賜道義白金千兩綵幣綺繡幣銀壺諸物并海
舟二艘

十一月平江伯陳瑄督海運至遼東舟還值倭寇劫沙門
島瑄率衆追至朝鮮境上焚寇舟始盡殺溺死者其衆
八年源道義卒賜謚恭獻子源義持嗣益奸狡時時令各
島人掠我海上

四月源義持遣使圭密等奉使貢方物謝賜父謚及命襲
爵恩 皇太子監國賜鈔幣有差

九年二月遣使嘉源義持屢獲倭寇賜金織文綺百疋鈔
五十緡 倭寇陷廣東昌化千戶所殺死千戶王偉等
五月倭寇磐石

十五年正月倭寇浙東五月又寇
六月倭船三十二艘泊靖海衛楊村島勅捕倭都督同知
蔡福等會山東都司合兵殄滅勿悞事機

十月時捕倭將士擒寇數十人獻京師賊首皆日本人羣臣言日本數年不修職貢今賊首乃其國人宜誅之以正其罪上乃遣禮部員外郎呂淵等賜勅切責之曰爾父畏天事大職貢不愆先烈之不圖而輕干上國爾罪必討朕所以隱忍者未忘爾父之恭耳爾其思之十六年四月呂淵自日本還義持奉表謝罪禮其使遣歸時內官張謙及指揮千百戶等官使西洋諸番還至浙江金鄉衛海上猝遇倭寇官軍在船者纔百六十餘人賊可四千鏖戰七十餘合大敗賊徒殺死無算餘衆遁去朝廷聞而嘉之賜獎勞陞賞有差

十七年倭船入王家山島傳烽沓至都督劉江率精兵疾馳入望海埭賊數千人分乘二十舟直抵馬雄島進圍望海埭江發伏出戰遣奇兵布伏諸山下斷其歸路賊奔入櫻桃園江合兵圍而攻之斬首七百四十二捕生八百五十七召江至京封廣寧伯倭自是不敢窺遼東宣德元年日本遣人來貢人船刀劍不奉我約束上諭使臣自後貢無過三舟使人不過三百刀劍毋過三十否不受七年以日本貢久不至命中使諭其王尋遣人來貢如約束受之

八年源義持卒命太監雷春少卿潘賜等吊祭

十年嗣王遣使貢謝

正統四年四月倭奴大寇浙東先

後得我勘合方物戎

器滿載而來遇官兵矯云入貢貢即不如期守臣幸無
事輒請俯順夷情主客者爲畫可條奏即許復貢云不
爲例嗣復再至亦復如之我無備即肆出殺掠滿載而
歸宣德末年海防益備賊不得間貢稍如約遂許夷至
京師宴賞市易飽恣其欲已而備禦漸疎是年寇大嵩
人桃渚官庾民舍焚劫一空驅掠少壯發掘塚墓束嬰
孩竿上沃以沸湯視其啼號拍手笑樂捕得孕婦卜度
男女剝視中否爲勝負飲酒荒淫穢惡至有不可言者
積骸如陵流血成川城野蕭條過者隕涕於是朝廷下
詔備倭命重帥守要地增城堡謹斥堠修戰艦合兵分
番屯駐海上寇盜稍息

七年日本來貢

八年九月倭寇浙東僉事陶成整飭海道率兵平之

十一年四月倭寇海寧乍浦

戊化二年四月倭忽至寧波知我有備矯稱進貢守臣爲
請於朝且欲遣至京楊守陳貽書主客力言其不可許
四年六月日本通事林從傑等三人奏原係寧波府衛人

幼被倭賊掠賣與日本爲通事今隨本國使臣入貢將
還乞容便道省祭從之仍禁其勿同使臣至家及私引
中國人通番如違聽有司治罪

五年二月日本使臣回還詐稱海上遭風喪失方物乞給
價回國禮部執奏不與且欲治其通事閻宗達教誘之
罪宗達本奉化人先年逃入海島今隨使來朝 上曰
宗達且不究治若再反覆族其原籍親屬

五月定海衛千戶王鎧言倭夷姦譎時掠海邊見官軍追
捕乃陽爲入貢伺虛則掩襲邊境往者大嵩嘗被其毒
近見使臣清啟入貢臣恐使回有異謀或爲掩襲之計

乞勅鎮守總督巡海等官設策防禦之兵部因言邇者
倭使清啟凌轢館僕殘殺市人迹實桀驁鎧言誠當宜
移文備倭巡海等官令督緣邊官軍務振軍容嚴斥堠
以防其奸

十三年二月日本入貢二十年日本遣周暉等來貢

弘治八年日本壽莫來貢

正德四年七月日本南海曾遣使來貢

六年六月日本遣宋素卿源永壽來貢求祀孔子儀注不
許鄞人朱澄告言素卿本澄從子叛附夷人守臣以聞
主客以素卿正使釋之令諭王效順無侵邊

國朝典彙卷一百六十九
日本
按素卿者卽朱編也逃入倭有寵於王易姓名克使其族人相與耳目爲奸利守臣白發之素卿厚賄闖瑾賜飛魚服遣歸

八年日本僧桂梧等來貢

嘉靖二年五月日本貢使大掠寧紹諸處時國王源義植幼闇無道國人不服政在大夫諸道爭貢左京兆內藝興遣僧宗設來貢而右京兆細川高亦遣僧瑞佐來與宋素卿偕先後至寧波市舶故事凡番貢至者閱貨宴席並以報至先後爲序時瑞佐後至素卿奸狡通市舶太監賴恩饋寶賄萬計恩令先閱瑞佐貨宴又令坐宗

設上宗設不平卽席間與瑞佐忿爭相仇殺恩又以素卿故陰助瑞佐授之兵仗宗設衆強益鬪燬嘉賓堂劫東庫逐瑞佐至姚江臨紹興府城索瑞佐不得殺掠至西霍山洋殺總督備倭指揮劉錦千戶張鏜縛去指揮袁璉百戶劉恩又自育王嶺逃至小山浦殺百戶胡源大掠寧波奪舟去

禮部言日本宋素卿來朝勘合乃 孝廟時所降其 武

廟時勘合稱爲宗設奪去恐未可信不宜容其入朝但二夷相殺釁起宗設而素卿之黨被殺甚衆雖素卿以華從夷事在幼年而長知效順已蒙 武宗宥免毋容

再問惟令鎮守等官省諭素卿回國移咨國王令其查明勘合自行究治待當貢之年奏請議處既而給事中張翀御史熊蘭等言各夷懷奸仇殺事干犯順乞明正其罪上命繫素卿及宗設夷黨於獄待報論決乃令鎮巡官詳鞫各夷情偽以聞

十一月給事中夏言等言鄉者倭夷入貢肆行叛逆地方各官不能先事剿捕而前後章奏言辭多遁功罪未明該部按據來文遷就議擬雖云行勘亦主故常乞勅風力近臣重行覆勘且寧波係倭夷入貢之路法制具有尚且敗事其諸沿海備倭衙門廢弛可知宜令所遣官

由山東循淮楊歷閩浙以極於廣會同巡撫逐一按視預爲區畫其倭夷應否通貢絕約事宜乞下廷臣集議得旨差風力科臣一員其餘事宜兵部議處以聞乃遣給事中劉穆往按其事

宋素卿等伏誅初宗設肆掠後匿入海島無可踪跡獨素卿瑞佐就執下獄待訊廷議備責沿海備倭官緝捕宗設無所得而朝鮮國王李懌奏稱倭奴入犯上國至殺官兵不伏天誅偷生到境仰仗皇威剿殺幾盡今將賊倭二俘仲林望古多羅首級三十三顆及長箭船牕等物并華人被虜者王漾等八人獻之闕下上命給事

中劉穆御史王道按覆之乃發仲林望等至浙江令與素卿對簿備鞠遣貢先後及符驗真偽獄既具乃論素卿叛正仲林望古多羅故殺各斬瑞佐等釋還本國失事人員各謫戍奪俸有差

遣日本夷僧妙賀等各歸國勅諭日本國王以宋素卿仲林望等克叛就戮妙賀等無罪以禮遣還其元惡宗設及佐謀倡亂數人亟捕繫傳送中國以聽天討餘並因治虜去人民仍優恤送歸不者將閉絕貢路徐議征討時有琉球貢使鄭繩歸國卽令賫勅傳諭之

十八年日本國王源義晴復遣使來貢

十九年源義晴差使顧鼎等來貢馬及獻方物宴賞如例又加嗣國王王妃使臣方物各給以價因乞給賜嘉靖新勘合及歸素卿等原畱貢物言官論其不可上命禮部會兵刑二部都察院僉議以聞覆言事情譎詐難信勘合令將舊給繳完始易以新素卿等罪惡深重貨物已經入官俱不宜許以後貢期貢船違例者阻回督遣使者歸國仍飭沿海備倭衙門嚴爲之備從之

二十三年日本使釋壽光等復來稱貢禮部言日本例十年一貢今貢未及期且無表文并正使難以憑信宜照例阻回其方物收候作下次貢儀移文本國知會詔如

例阻回方物仍令本夷帶還各該所司省發起程既而各夷嗜中國財物相貿易延歲月不肯去巡按浙江御史高節請治浴海巡視備倭等官故縱之罪從之

二十五年倭寇寧台自嘉靖元年罷市舳舻凡番貨至輒賒與奸商久之奸商欺負不肯償番人泊近島遣人坐索不得番人乏食出沒海上爲盜久之百餘艘盤據海洋日掠我海濱不肯去小民好亂者相率入海從倭克徒逸囚罷吏黠僧及衣冠失職書生不得志羣不逞者皆爲倭奸細爲之鄉導於是王五峰徐必溪毛海峰之徒皆我華人金冠龍袍稱王海島攻城掠邑莫敢誰何浙

東大壞至是巡按御史陳九德請置大臣兼制浙福乃以朱統爲都御史巡撫浙江兼領福興泉漳統任怨任勞嚴禁閩浙諸通番勾引主藏者凡隻檣餘艘一切毀之時浙人通番皆自寧波定海出洋閩人通番皆自漳州月港出洋往往諸達官家爲之強截良賈貨物驅令入舟統因上言去外夷之盜易去中國之盜難去中國之盜易去中國衣冠之盜難於是福建海道副使柯喬都司盧鏜捕獲通番九十餘人統欲禁止令行遣旗牌督決於演武場一時通番稍息而巨姓諸不便者大譁詆誣惑亂視聽諷御史周亮給事葉鏜奏改統爲巡視

從之統尋罷卒

二十七年源義晴差正使周良等來朝貢方物宴賚有差以白金錦綺報賜其王及妃時良等不及貢期以六百餘人駕海舟百餘艘入浙江界求詣闕朝貢巡撫朱統以聞禮部以倭夷入貢舊例以十年爲期來者無得踰百人舟無得過三艘乃良等先期求貢舟人皆倍數於前情實叵測宜令統循十八年例起送五十人赴京餘畱嘉賓館量加賞犒着令回國報可已而統力陳不便狀禮部欲賞其百人如例非正額者皆罷勿賞良因自陳貢舟高大勢須五百人中國商舶入夷中往往匿海島爲寇故增一艘者護舟故也非敢故違明制禮部不得已請百人之外各量加賞犒百人之制彼國勢難遵行請相其貢舟斟酌又良等持弘治勘合十五道言其餘七十五道爲宋素卿子宋一所盜捕之不得正德勘合畱五十道爲信以待新者而以四十道來還部覈其簿籍脫落故勘合多未繳請勿予新者令異時入貢持所畱正德勘合四十道但存十道爲信始以新者予之而宋一所盜責令捕索以獻報可

三十一年四月倭寇台州巡按御史檄知事武備禦之偉突入賊中伏發衆潰偉死之

初朱統既卒罷巡撫不復設又以御史宿應參之請復寬海禁而舶主土豪益連結倭賈為奸日甚官司以目視莫敢誰何有王直者徽人也以事亡命走海上為舶主渠魁倭奴愛服之其黨徐學毛勳徐海彭老等不下數千人俱列兵近港乘巨艘為水砦且築屋港上諸山時時出入近洋掠我居民至是遂登陸犯台州破黃巖縣殺掠慘甚復四散大掠象山定海諸處浙東為之騷動矣按王直即五峰徐海即明山毛勳即海峯也毛勳以王直義子稱王澈六月浙江巡按御史林應箕奏倭寇焚劫地方狀因叅署海道副使李文進分巡副使谷嶠僉事李廷松叅議李

寵顧問備倭把總等官周應禎周奎楊材等各失事當治給由海道副使丁湛新推備倭指揮張鈇皆臨難規避宜並罰於是給事中王國禎御史朱瑞登交章請復設都御史疏下吏兵二部覆議國禎等言是但巡視都御史必當兼假以巡撫總督之權使之節制諸省方可責其成功其閩浙兩省仍各添設叅將一員駐劄邊海地方上從其議暫設巡視浙江兼管福興漳泉提督軍務大臣一員督兵勦賊其兼管巡撫等項須待賊平議處叅將准添設丁湛罷為民以李文進代之張鈇革回原衛以周應禎代之仍各同李寵顧問谷嶠李廷松

周奎楊材等住俸戴罪殺賊林應箕標準專勅官給由
離任令奪俸三月

七月以都御史王忬巡視浙江海道及福興漳泉地方尋
改巡撫

三十二年三月王忬督兵破倭寇於普陀諸山初都指揮
盧鏜坐都御史朱統事尹鳳坐贓累俱繫獄忬諳知其
能奏釋之以爲副將募沿海壯民及徵狼土兵分帥之
日犒撫激勵欲得其死力而倭魁王直等結砦海中普
陀諸山顧時出近洋襲我軍忬偵知之乃遣叅將俞大
猷帥銳兵先發而湯克寬以巨艘繼之徑趨倭砦縱火

焚其廬舍戕倉皇覓餘艘走我兵隨擊大破之斬首五
十餘級生擒百四十三人焚溺死者無算忽颶風發兵
亂渠魁王直率衆乘間逸去都指揮尹鳳復以閩兵邀
擊于表頭北芟諸洋斬首百餘級生俘二百餘人先後
以捷聞賜白金文綺有差

四月倭攻破昌國衛屯據凡五日俞大猷以舟師攻退
有蕭顯者尤桀狡率勁倭四百餘人攻吳紹松江所南滙
所俱破之屠掠極慘分兵掠江陰圍嘉定太倉已而王
忬遣盧鏜倍道掩擊斬蕭顯餘衆復奔入浙

倭寇破臨山衛乘勝西犯松陽知縣羅拱辰督處州兵禦

却之賊浮海走叅將俞大猷以舟師邀擊斬首六十九級

倭攻福寧州秦嶼所破之大掠而去

江北倭掠海州殺二百餘人

五月倭圍叅將湯克寬叅政潘恩僉事姜廷頤於海鹽環四門攻之不克縱火焚城樓及民屋數百間而去

倭攻陷乍浦所知縣羅拱辰復督兵來援倭引去流劫奉化寧化諸處克寬追圍於獨山民家以火焚之賊半死餘衆奪道走遁於海

倭復入上海知縣喻顯科迺指揮武尚文縣丞宋鰲戰縣街中不勝死之賊據城數月焚廬解畧盡

南科賀涇奏倭犯浙東以防守密泊寶山窺蘇湖密邇京口瓜儀運道咽喉宜添總兵住劄吏部李默奏添官兼餉以屠大山爲督儲撫應天

兵部議遣將領分屯要地令四司官分行點劄而列官兵龍江關命職方郎中阮犀犀苦衆持首鼠乃慷慨調度陰詞虛實以爲備禦

時諸倭巢穴旣燬王直徐海等奔散四出倏忽千里於是自台溫嘉湖寧紹蘇松淮揚十郡俱罹其害同時告急俞大猷湯克寬雖智勇可任而江南人素柔軟倭揮雙

刀銀光耀日望風奔潰倒戈就戮死者相枕相載而去
當時文武吏不能以軍法繩下有司往往以軍法脅富
人巧索橫斂指一科十師行城守餉犒類多乾沒十不
給一廉謹者又以吳人善謗束手不敢動一錢給賞遂
致公私坐困戰守無策寇來不支始釋柯喬起盧鏜而
賊船瀰滿海上自閏三月登岸至六月旋畱內地凡三
月遂至攻陷昌國臨山霽霽乍浦青村南滙吳松江泰
嶼諸衛所圍海鹽太倉嘉定長洲入上海掠華亭崇明
青浦海寧餘姚定海象山慈谿山陰會稽臨海平湖嘉
興黃巖諸縣金山錢倉諸所鄉鎮焚掠殆盡

有失船僑四十人突至平湖海鹽焚掠官兵禦之皆敗績
殺一把總四指揮及百戶縣丞竟奪舟去

六月應天巡撫彭黯巡按陶承學等言倭勢日熾非江南
脆弱之兵承平統袴之將所可辦請得便宜調山東福
建等處勁兵及勅巡視浙江都御史王忬督官兵船騎
角攻剿疏下兵部覆山東陸兵不諳水鬪福建海滄月
港亦在戒嚴豈能分兵外援宜令黯等就近調處州杭
兵一二千名仍隨宜募所屬濱海郡縣義勇鄉夫分布
防禦并請命王忬互相應援其應用兵船糧餉器械火
藥許徵發所在支用南京署兵部尚書孫應奎亦言倭

夷劫掠漸近留都沿江津隘已議調官軍防守應用甲
仗糧芻乞命南京戶工二部給發 上允之

七月太平府同知陳璋等統兵敗倭斬首千餘級餘寇出
境浮海東遁應天巡撫彭黯浙福巡撫王仔以聞既而
擢蘇州同知任環整飭蘇松兵備陳璋共贊軍務立有
戰功以與時相忤僅蒙欽賞而已

十月自倭眾東遁後江南稍寧惟崇明南沙泊失風倭幾
三百人舟壞不能去參將湯克寬及僉事任家雷兵守
之日久不克克寬復督邵漳等兵擊之賊績亡卒四百
餘人

先是倭賊百餘由華亭縣崇缺登岸流劫戚水涇金山衛
等處至是移舟泊寶山參將湯克寬引舟師追擊及於
高家嘴燬其舟斬七十三級生擒十四人
有倭舟失風飄至興化府南日舊寨登岸流劫殺千戶葉
巨卿把總指揮張棟督舟師擊倭走據山知府董士弘
糾民兵獵戶與棟等合勢圍賊殲之是時海洋並岸諸
島多栖寇舟有真倭阻風汛不獲歸者有沿海奸民捨
江南族候來歲倭至者未幾南日寨復有三舟登岸棟
士弘擊之引去擒賊數人皆真倭比泉州舟兵巡海攻
賊於石圳澳深泥灣等處凡再戰擒賊四十餘人則皆

臨海漳浦揭陽等縣入葢江南海警倭居十三而中國
叛逆居十七也

二十三年正月時倭據太倉南沙五月餘官軍列艦海口
圍之數重不能破軍中多疾疫乃佯棄數舟開壁東南
陬賊遂潰圍出海轉掠蘇松各州縣

三月南直隸續至倭寇二千餘自南沙登岬分掠蘇松諸
處叅將湯克寬帥兵擊敗之於採洵港斬首百八十級
叅將俞大猷督兵勦普陀山倭寇我軍半登賊突出乘之
殺武舉火斌等三百餘人

蘇松倭掠民舟入海趨江北大掠海門如臯通州焚各鹽

場至揚州殺一同知一千戶有飄入青徐者山東大震
復以盧鏜爲叅將俞大猷爲浙直總兵

先是巡撫王忬奏薦盧鏜爲叅將鎮閩代克寬閩人故
忌鏜劾鏜克險不可用罷之而沿海大猾且言忬令大
猷搗巢非計欲搖動忬忬不爲動已而南京各官薦復
用鏜大猷將帥稱得人云

以尚書張經總督浙福江南北軍務時朝議欲徵狼土兵
剿寇以經嘗督兩廣有威惠爲狼兵所戴故用之經請
調永順保靖等宣慰司各率兵剿賊

四月倭寇自海鹽趨嘉興叅將盧鏜等帥兵禦之礮却次

日復戰於孟宗堰伏發殺官軍四百人溺死五百人都
司周應禎指揮李元律千戶薛綱宋應漸等俱死之賊
乘勝入據石墩山分兵四掠
倭寇攻嘉興府城副使陳宗夔帥兵禦却之焚其舟賊遂
入乍浦與長沙灣寇合犯海寧諸縣

倭寇自嘉興東掠入海至崇明夜襲破其城知縣磨一岑
死之

初通州河之役賊兵僅百餘人鹽徒及脇從者千餘人時
叅將解明道擁衆兵居城中揚州府同知朱哀儀真守
備張壽松軍城外鳳陽巡撫鄭曉發兵往援檄原任都

指揮月輪將之輪辭以非朝命不至乃更檄兩淮運判
馬崙原任守備陳津往會千戶洪岱等合戰城內外兵
無策應者岱等孤軍敗與千戶文昌齡王烈皆死至是
曉上疏言狀因請治明道等畏怯輪推避之罪得旨
洪岱文昌齡王烈俱贈指揮同知子孫陞襲櫛明道與
壽松等職各戴罪立功輪令巡按御史逮至京問

兵部覆巡按直隸御史孫慎言浙江江北諸郡倭患方殷
蘇松二三月間所在告急皆經畧失人軍令不嚴所致
乞勅巡撫屠大山收召忠勇之士申明軍之罰仍榜
諭沿海居民有能奮身殺賊者如軍功陞賞所得倭器

悉以與之計擒首賊者許奏陞指揮僉事世襲一切軍費悉從便宜區處督糧叅政翁大立無事令來往蘇松常鎮催給糧餉有事專住松江以便調度詔以其議屬大山舉行仍令赴任不許遲緩

倭自崇明進薄蘇州城大掠時給事中王國禎上禦倭方略言懸賞招降賊首王直非計兵部尚書聶豹覆言海賊與山賊異山賊有巢穴可以力攻海賊乘風飄忽瞬息千里難以力取臣聞王直本徽人以通番入海得罪後嘗爲官軍捕斬海寇陳嶼主等及餘黨二三百人欲以自贖當時有司不悉收之遂貽今日大患故倣岳飛

官楊么黃佐故事懸賞購募以賊攻賊非輕王爵以示弱也 上以國禎言是令一意剿賊脅從願降者待以不死賊首不赦

六月福建官兵捕得漳州通倭賊蘇老等三十餘人誅之倭寇由吳江轉掠嘉興都指揮夏光督兵禦之背王江涇而陣賊衆鼓譟而前我兵大潰光急入舟中流矢溺死七月蘇州倭寇至嘉善轉趨松江出海總兵俞大猷擊敗之於吳松所擒七人斬首二十三級

八月倭寇自嘉興還屯採淘港柘林等處進薄嘉定城會募兵叅將李逢時許國以山東民鎗手六千人至與賊

遇於新涇橋逢時率其麾下先進敗之賊退據羅店鎮
官軍追及之擒斬八十餘人

山東兵復追擊倭寇至採淘港乘勝深入伏起我兵大潰
溺水死者千人指揮劉勇等死之初新涇之捷李逢時
功最許國恨逢時與之同事而不先約已乃別從間道
襲賊欲以奪逢時功會暮大雨劉勇等兵先陷沒諸軍
繼之皆倉卒不整遂大敗

刑部主事郭仁以賊首王直挾倭奴亂海上引 祖宗諭
三佛齊故事請勅令朝鮮宣諭日本國章下兵部覆言
宣諭乃國體所關最宜慎重蓋倭寇方得志恣肆比之

往者益爲猖獗恐未可以言語化誨懷服也若猶夏之
罪未懲而綏以撫諭非所以蓄威糾引之黨未得而責
以斂戢非所以崇體矧今簡將練兵皆有次第待其畏
威悔罪然後 皇上擴天地之仁頒恩諭以容其更生
未爲晚也且 祖宗時三佛齊止因阻絕商旅非有倭
奴匪茹之罪朝鮮近上表獻俘心存敵愾如復令其宣
諭恐亦非其心矣臣竊以爲不便 上從部議

十月命錦衣衛械繫原任應天巡撫屠大山叅將許國李
逢時副總兵解明道至京訊治先是採淘港之役坐兩
將不相能各兵趨利不止故垂成而敗時明道督水兵

自海軍生視不救大山方稱疾不視事至是御史張師
价以敗書聞請治大山逢時國明道各失事罪總督張
經因論山東監軍叅政許大倫副使周臣紀律不嚴亦
宜量罰於是大山逮至黜爲民明道等坐失律罪斬大
倫臣降三級邊方用已東兵見主將被逮鬱鬱思歸稍
自引去總督張經請下有司追捕兵部言此輩俱係北
土烏合之兵驅之蘇松水澤之地固不相宜今悉遣之
詔可

浙江巡按御史胡宗憲奏上十月至十一月倭寇自健跳
所分掠紹興各縣水路官兵前後擒斬三百餘人請錄
巡撫都御史李天寵總兵俞大猷原任副使陳宗夔陳
應魁等功 上從部覆令先賞天寵等銀幣其所獲功
次下御史再勘

三十四年二月應天巡撫周琬言禦倭有十難有三策其
十難謂去來颺忽難測海涯曼衍難守水陸勾錯難戰
鬼蜮變詐難知盤據堅久難備居民柔脆難使土地瀉
鹵難城主客兵力難恃芻糧匱乏難措將領驕懦難任
其三策謂據海上陳前馬跡諸扼倭夷出沒之路置福
船二百倉山船三百與兩浙兵船會哨於諸島之間來
則擊之去則擣之制人而不制于人也以捷船五百

送哨於蘇州海口選土兵舊條列戍於松江之護塘俟賊登岸而掩擊之中也集松江輕舸五六百艘遊哨於黃浦吳松太湖小港之間使賊步不敢深入舟不敢橫行下也更請趣調狼兵土兵漳兵畱淮浙餘鹽銀十萬兩或借南贛軍餉九萬兩爲犒賞之需兵部覆奏從之工部侍郎趙文華疏陳備倭七事一祀海神一降德音一增水軍一差田賦一募餘力一遣視師一察賊情疏下部覆謂祀海神降德音增水軍募餘力察賊情俱有裨軍政下督臣酌行差田賦恐致擾民遣視師宜行總督張經獎率諸軍不必別遣會崑山致仕侍郎朱隆禧

奏請添設巡視福建都御史并開互市之禁 上諭閣

臣曰南北兩欺不宜怠視本兵若罔知者文華隆禧二臣之疏似不同泛奏者當有依焉今南破北虛豈爲國之道耶祖宗教養深恩豈以怨讟時君而忘先聖大德卿等其集兵部科臣示朕此意令盡忠猷以告於是兵部尚書聶豹等震懼請罪言文華之疏臣度其可行者已奏可之其事有窒戾者亦復疏陳其畧至如隆禧所奏設巡視科臣謂官多民擾其云開互市科臣亦謂示弱兼以北虜之市爲監皆駁寢之且昨歲文華已有市舶之議戶部所在守臣計處至今未報臣惟 祖宗制

委絕其朝貢至以勳臣出鎮海波始清當時絕不言及
市舶意良有謂且浙直兵力脆弱所恃徵調以策應緩
急者獨有漳泉兵耳若更設巡視閩中則人懷自顧漳
泉之兵豈得復爲蘇松兩浙之用今兵力四集南倭似
有可平之漸而宣大諸境邊臣亦各矢力奮猷足寢北
虜之謀倘所任不効則當治諸臣及臣等之罪疏入得
旨南北兩欺倭賊殘毀地方尤甚昨下諭求平剿長策
欲豹等入告忠猷今此疏何有忠猷之告其更悉心計
處以聞於是豹益惶恐因上便宜五事 上曰爾等職
任本兵坐視賊欺不能設一策平剿又奉諭問却令泛

言具對據拾舊文塞責豹姑降俸二級侍郎翁溥等各
奪俸半年所司郎中張重降二級調外任餘各奪俸二
月已復降勅切責張經躡久罔效令其嚴督諸臣亟爲
剿賊安民如再因循重濫不貸

三月兵部覆浙江巡按御史胡宗憲疏報正月朔柘林倭
奪舟犯乍浦海寧攻陷崇德又轉掠塘西新市橫塘雙
林等處復攻德清殺把總梁鶚指揮周奎孫魯百戶陸
陵周應辰理問陶一貫等請正失事諸臣之罪并錄有
功及死事者 上以城陷失事重大命巡按御史執崇
德知縣蔡本端解京訊治叅將湯克寬把總指揮丁僅

下督撫先取死罪招巡撫李天寵都指揮吳韜邵昇領兵僉事羅拱辰俱停俸戴罪殺賊奪副總兵俞大猷及叅將謝少南兵備副使陳應魁僉事凌雲翼等俸三月下指揮等官李上等七人於按臣問周奎等陶一貫各贈襲如例獲功知縣楊芷千戶曾勇監生喬鏜等各令軍門獎賞有差已逮本端至坐失陷城治謫戍

四月廣西田州土官婦瓦氏引狼土兵應調至蘇州總督張經分配總兵俞大猷等殺賊奏聞詔賞瓦氏及其孫岑大壽大祿各銀二十兩紵絲二表裡餘令軍門獎賞命趙文華祀海神是時倭據川沙窪柘林爲巢經冬涉春

新倭復日有至者地方甚恐及聞狼兵至人心稍安賊分衆三千餘過金山衛總兵俞大猷遣遊擊白滋等及瓦氏兵遮擊之稍有斬獲文華至松江因謂狼兵果可用厚犒之激使進剿至漕涇遇倭數百人鼓衆衝戰不勝頭目鍾富黃維等十四人俱死失亡甚衆於是賊知狼兵不足畏復奔犯浙江肆掠如故矣

胡宗憲言往時日本入貢多不及期請待其後來得以便宜謝遣仍令有司移檄於王問以島夷入寇之狀兵部尚書楊博覆言令按臣移檄日本國王問何人倡亂令於半年間立法鈐制號召還國卽見忠款雖貢期未及

必爲奏請否則是陽爲入貢陰蓄異謀也 上是其議

廣東賊徐銓方武等與海賊王直糾結倭夷縱橫海上兩
廣總督鮑象賢檄海道副使汪柏等督戰銓等就戮前
後斬首千二百餘級海濱頗靖

倭犯江北淮揚等處前後由通州之餘東場海門之東夾
港地方登岬流劫狼山利河等鎮呂四餘西等場

江北倭突入通州南門燒民屋二十餘間而去

三丈浦倭賊分衆掠常熟江陰村鎮兵備任環督保靖土
兵千餘及知縣王秩指揮孔燾分統官民兵三千攻其
巢破之斬首五十餘級燒賊船二十七隻賊奔江陰

川沙窪倭駕舟出海官兵縱火焚其巢幾蕩賊舟一至戚
家墩遊擊白法劉恩至獲之斬首三十七級是日江陰
賊亦出江東遁

五月柘林倭合新倭四千餘人突犯嘉興總督張經分遣
叅將盧鏜等督狼土等兵水陸擊之保靖宣慰使彭蓋
臣與賊遇於石塘灣大戰敗之賊遂北走平望副總兵
俞大猷以永順宣慰司官舍彭翼南邀擊之敗奔回王
江涇保靖兵復擊其後賊遂大潰諸軍共擒斬首一千
九百八十有奇溺水及走死者甚衆餘賊不及數百奔
歸柘林自有倭患來此第一功云

倭五十餘人自山東日照流劫東安衛至淮安贛榆復自
贛榆流劫沐陽桃源等處至清河阻雨徐邳官兵分道
感之殲於馬頭鎮民家斬首四十一級此賊自日照登
岸以數十人流害兩省殺戮千餘人至是始滅
倭舟三十餘艘衆約千餘人自海洋突犯蘇州青村所攻
城不克遂縱火自焚其舟登岸肆劫是時新倭復大至
自青村外若南泖小烏口浪港諸處悉有賊至泊岬卽
舍舟殺劫官兵稍稍逼之乃合勢犯蘇州陸涇壩及婁
門南京都督周于德引兵來援一戰而敗鎮撫蘇憲臣
被殺賊遂衆分其中爲二一由齊門撞馬頭而北轉掠
泇聖關長洲五都地一由胥門木瀆而南轉掠吳縣橫
鎮延蔓常熟江陰無錫之境出入太湖莫能禦者

南京御史屠仲律條上禦倭五事一絕亂源言宜禁放洋
巨艦窩藏巨家及下海奸民二防海口言宜守平陽港
拒黃花澳據海門之險則不得犯溫台塞寧海關絕湖
口灣遏三江之口則不得窺寧紹把鯨于門則不得近
杭州防吳淞江備劉家河則不得掩蘇松嘉興三責守
令言宜責江南守令當以訓練土兵保全境土爲殿最
四議調發言近日徵調各處民兵無慮數萬而膚功不
奏坐不善用兵之十弊五作勇敢言沿海如沙民鹽徒

打生手及村庄悍夫皆勇悍可用宜獎諭收錄令併力
戰守詔部議行之

詔逮總督張經及參將湯克寬械繫來京以趙文華劾也
倭自去歲據松江柘林川沙窪二處爲巢縱橫肆掠周
回數百里間焚屠殆徧水陸兵無敢近者是年春田州
土官婦瓦氏及東蘭南丹那地歸順等州狼兵六千餘
名承經調至狼兵輕悍嗜利聞倭富有財貨亟欲取之
居民亦苦倭寇暴朝夕冀倭一戰文華旣至嘉興屢趣
經亟檄狼兵勦滅經言賊狡且衆今檄召四方兵獨狼
兵先至耳此兵勇進而易潰萬一失利卽駭遠近觀聽

姑俟保靖永順土兵至合力夾攻庶保萬全文華再三
言經終守便宜不聽文華劾經玩寇殃民畏異失機惑
於湯克寬謬言欲俟倭飽載出洋以水兵掠餘賊報功
塞責耳宜亟治以紓江南大禍上以問大學士嚴嵩
對具如文華言且謂蘇松人怨經不可復留宜與克寬
俱逮京鞫訊以懲欺怠克寬遂併得罪尋以巡撫應天
都御史周琬爲兵部右侍郎仍兼原職代經總督

原屯川沙窪倭賊復突犯閘港周浦等處奪舟過浦分掠
泗涇北幹山僉事董邦政遊擊周藩引兵追擊遇賊驚
潰藩被創死軍士死傷者幾三百人賊遂屯駐石塘橋

流劫崑山石浦諸鎮

提督浙福都御史李天寵以四月間金山衛之敗來聞因
叅副總兵俞大猷統調集重兵失機債事以致流毒浙
省 上批其疏曰俞大猷統狼廣兵萬餘不行進勦致
賊猖獗本當重治姑奪職克爲事官戴罪殺賊

總督都御史張經以平望王江涇大捷來聞於是給事中
李用敬閔望雲顧弘潞袁世榮高敏字等因言經與
失事罪之誠當但今獲首功一千計正倭奴奪氣我兵
激奮之時宜乘勢搗柘林川沙窪之巢以殲醜類若復
易帥恐悞機宜請姑召還錦衣使者待進兵後視其成

績與否從而逮經加罪未晚也 上覽疏大怒手批曰

張經欺怠不忠聞文華之奏也方有此一戰是何心也
此輩黨奸惡直沮法怨上罪不可貸乃命錦衣衛執用
敬等各杖五十黜爲民已而 上心疑之以問嚴嵩嵩
言此事臣昨問徐階呂本二臣以鄉郡被慘聞見甚真
皆怨經養寇損威殃民糜餉不逮問無以正法昨狼兵
初至氣銳經禁久不進羗氏憤曰我自備軍糧不效尺
寸何以歸見鄉黨及賊逸甚多地方震恐文華憤不能
平與御史胡宗憲合謀督兵追賊經聞繼至今次文華
誠忘身殉國然亦巡按力宗憲勇敢有膽略親擐甲臨

國朝典彙卷一百六十八
日本
三十一
戎以致克捷此實 上天垂祐所致 皇上昨諭欲遣
官賜文華銀幣以壯彼威仰見激勵臣工至意但宗憲
功同希亦賜一賞使彼地之人知日月之明無遠不照
功者勸罪者懼矣 上乃諭禮部曰昨文華不言賊情
未免又誤可令竭忠督討仰贊玄威其遣衛官一員賚
賜文華宗憲及瓦氏銀幣有差

趙文華疏報捷謂前月倭犯嘉興御史胡宗憲先中以藥
酒擊敗之兪大猷率永順宣慰彭翼南等又敗之於王
江涇擒斬千餘人叅政任環又敗之於常熟斬首百五
十級焚其舟二十七而金山衛等斬獲亦不下二百賊
衆蕩平有期矣兵部言據此捷奏兵威稍揚人心正奮
然在浙江則餘黨未遯在松江則舊巢尤在宜乘勝逐
捕以靖地方請先賞將士用命者 上命賞彭翼南等
四人各銀幣餘軍門領賞

倭寇常熟屢攻不克移舟泊三里橋知縣王秩及鄉官叅
政錢泮率耆民家兵追賊及於上滄港爲賊所掩擊俱
死其民丁僅有脫者巡按御史金淞上其事 上憫二
臣死事詔贈秩爲太僕少卿泮光祿卿各廕一子錦衣
百戶世襲賜祭立祠有司歲時享祀

趙文華復疏陳倭夷出沒之形并劾巡撫周琬總兵白汝

僉事董邦政等縱寇喪師使令賊奔潰餘孽復張因言
巡按御史胡宗憲才志異常安危可寄宜亟付以大任
兵部覆議 上責琬統重兵不能擒斬逸賊致蹶將損
師本當逮治第時方用人始停琬俸褫滋及邦政職克
爲事官戴罪殺賊如更怠縱罪無赦宗憲俟論功之日
不次超擢文華命督師叅奏償事者勿畏避

六月倭賊百餘自上虞爵谿所登岸突犯會稽高埠奪民
居樓房據之知府劉錫千戶徐子懿等分兵圍守賊潛
縛木筏由東河夜渡潰圍而出鄉官御史錢鯨遭於鯉
浦見殺賊遂流劫杭州而西歷於潛昌化內地大駭

倭進據江陰蔡注開分衆犯唐頭知縣錢鏗統狼兵禦之
遇賊於九里山時已薄暮雷雨大作伏兵四起狼兵悉
奔惟餘鏗及民兵八人盡死於賊按臣上其事詔贈鏗
光祿少卿廕子賜祭立祠死所

勒浙直總督周琬浙江巡撫李天寵爲民以侍郎楊宜兼
僉都御史代琬以御史胡宗憲代天寵先是 上聞琬
疾甚又以天寵嗜酒廢事遂併黜之乃命趙文華悉心
督察命禮部鑄督察關防馳賜之

三板沙倭賊奪民船出洋叅政任環督總兵俞大猷引舟
師追擊於馬蹟山擒倭首灘捨賣及賊五十七人斬首

九十三級是日倭舟被海風飄回者五十人屯嘉定民
家環率兵攻之不克乃投火民舍焚之賊盡死既而環
有親喪按臣周如斗以倭寇未平請畱之詔奪情任事
如故

七月倭犯南京先是高埠逸倭自杭州西掠至淳安僅六
十餘人以浙兵逼急突入歙縣流劫至南陵趨太平府
時操江都御史駐太平督兵禦之賊引而東犯江寧鎮
守備遣指揮朱襄等率勇士數百人出時賊已至板橋
襄等怠緩不知袒裊縱酒一遇賊盡為所殲羣賊沿途
殺人由安德鳳臺夾崗各門外鄉落搶掠趨秣陵關時
應天推官羅節卿指揮徐承宗率兵千人守關望風奔
潰賊遂過關而去

趙文華言始者賊逸松江也宜慰彭蓋臣等與賊相持十
晝夜賊遁蘇州蓋臣及俞大猷任環合兵追之於陸涇
壩斬首五六百級兵勢稍振頃二司兵失利而賊遂散
逸一犯宜興一犯長興勢復猖獗良由我兵寡勢分士
氣不揚耳臣以為蓋臣等報效之勤宜勞寇至蘇州我
軍盡云火器委諸賊中而又海上福滄等州七十餘船
皆為賊燬臣以為諸臣失事之罪宜問兵部覆議 上
命降勅獎勵彭蓋臣彭明輔各賜銀二十兩紵絲一表

禮官舍彭翼南准實授生員彭守忠給與寇帶其福滄
兵船被燬失事令按臣覈實以聞

巡按直隸御史周如斗因常熟之敗疏言越浦之寇蔓延
內地流毒日深諸臣防禦失策致鎮撫孫憲臣身嬰賊
鋒知縣王秩鄉官錢泮繼及於難前後雖有小捷所喪
敗實多因叅兵備副使任環功不掩過海防僉事董邦
政罪浮於功及巡捕同知王如瓚把總姜且等失守慢
防之咎請卹錄憲臣等而正環等罪又言永順保靖之
兵屢戰多捷實湖廣副使孫宏軾叅議王維洛監督有
方及官舍彭翼南彭守忠等實心幹濟請優賞以示兵

部議覆詔宥環下如瓚等於御史問賜宏軾維洛各銀
幣贈憲臣指揮僉事襲陞其子三級

南京御史葉恩以倭破杭州北新關劾奏提督李天寵失
誤軍機罪宜重治詔差官校逮問時胡宗憲亦疏劾天
寵縱寇殃民叅將尚允紹等防禦寡謀請罷天寵而治
允紹等罪得旨天寵已逮允紹姑革職克爲事官與
守巡官俱奪俸令戴罪自效已天寵詣京下獄竟以失
律喪師論死西市

張經湯克寬逮至詔下法司議罪經上疏自理言倭寇嘉
興卽委盧鏜督保靖兵援嘉興委俞大猷督永順兵由

國朝典彙卷三十九
柳湖間道趨平望以扼賊路令湯克寬引舟師從中擊
之一戰而勝凡斬馘一千九百有奇焚溺死者無筭賊
氣遂餒豈有一毫怠玩之念自臣蒞任方半年前後俘
斬以五千計惟是智略淺短不能俄頃掃盪此則臣罪
不報刑部尚書何鰲竟論克寬與經罪死繫獄待決
八月倭自南京秣陵關至溧水縣楊林橋典史林文景率
兵迎遏不能禦署縣縣丞趙珠臣棄城走遂由小北門
入城宴飲民家信宿乃去

柘林倭賊載舟出海僉事董邦政總兵俞大猷各督所部
水兵分哨擊之斬首七十有奇獲船九艘邦政復以嘉
定兵擊賊於寶山斬首九十八顆

溧水倭流劫溧陽趨宜興至岳亭關聞官兵自太湖出取
道官路橋黃土越武進境抵無錫惠山寺一晝夜奔一
百八十餘里我兵追及急擊之賊夜走望亭次日至滄
墅關蘇松巡撫曹邦輔督各官兵圍之

南京御史金澍陶承學各言中國叛人王直久住日本主
謀煽禍乞懸立爵賞俘馘賊首及將兩京十三省見監
并緣事大小武臣許令殺賊贖罪及公侯勳戚世臣有
蓄養家丁行令督率效用兵部議覆賞格宜如宣大例
有能擒斬王直來獻者封伯爵賞銀萬兩授坐營坐府

國朝典彙卷二百六十九
職銜管事斬獲黨酋如明山和尚輩者授指揮僉事賞
三千兩緣事武臣本犯仍監候許令子弟家丁報效贖
罪克軍以擒斬十名願永遠克軍者以二十名願死罪
者以三十名願爲宰勳戚家丁未便姑已之詔悉從部
議第武臣犯死罪者不准贖

倭自宜興奔蘇州會柘林賊爲風飄旋者三百餘進據陶
宅港巡撫曹邦輔慮二賊合且爲大患乃親督副使王
崇古會集各部兵扼其東路四面感之賊逃至五龍復
至海灣山我兵隨地與競頗有斬獲太倉衛指揮張大
綱被殺士卒傷亡亦衆時僉事董邦政把總婁宇督沙

兵守陶宅邦輔計陶宅賊據險且衆未可進兵乃召邦
政宇以沙兵助勦一戰斬首十九級賊始懼奔吳舍欲
潛走太湖我兵覺追及於楊林橋盡殪其衆此賊自紹
興高埠竄不過六七十人流劫杭嚴徽寧太平至犯雷
都經行數千里殺戮及戰傷無慮四五千入凡殺一御
史一縣丞二指揮二把總入二縣歷八十餘日始滅

九月趙文華以蘇寇之捷已不得與爲恨見調兵四集謂
陶宅寇乃柘林餘孽可取胡宗憲因大言寇不足平以
悅其意遂悉簡浙江精銳得四千人文華宗憲親將之
營於松江之磚橋因約曹邦輔以直隸兵會剿定期浙

兵分三道直兵分四道東西並進賊悉銳衝浙兵諸營皆潰我兵擠沈於水及自蹂踐死者甚衆指揮邵昇千戶劉勳損失軍士凡千餘人直兵所陷賊伏中死者二百餘人由是賊勢益熾

南京給事中朱文漢御史侯東萊各以倭犯京城狀聞叅內外守備官撫寧侯朱岳太監郭璫及兵部尚書張時徽侍郎陳洙等時徽亦條上失事死事諸臣始末詞多隱護中有信宿之間遂爾潛遁城外地方一無所傷等語於是給事中丘橈疏叅之下吏兵二部議覆請降時徽俸級令策勵自效上以本兵任重不允特詔時徽及洙俱致仕

倭舟三艘泊台州海洋之螺門備倭都指揮王沛等引舟師出哨遇於大陳山嶼擒賊十七人斬首九級餘賊棄舟登山走匿我兵焚其舟四面環守叅將盧鏜以大兵會之入山搜勦生擒真倭烏魯美他郎酋首林碧川等八十四人斬首三十八級由是三舟之倭盡殄

浙江兵備副使劉燾督兵五千餘分三道攻陶宅倭巢倭二百餘來迎敵諸軍望見散走燾與家丁陸本高等二十餘人各引滿射之賊不敢逼燾僅以身免

十月應天巡撫曹邦輔以剿滅蘇州泔墅關倭寇聞且言

僉事董邦政及婁宇聞命疾趨躬履行陳橫犯鯨鯢之衆不旬日而芟削之可謂奇功請亟加褒錄浙直總督楊宜亦報捷如邦輔言復叅邦政雖有斬馘功然實故違節制當罪督察侍郎趙文華又言柘林餘賊復巢陶宅巡撫胡宗憲督兵四千來松江會剿而巡撫曹邦輔僉事董邦政不協力進兵顧乃避難趨易僥倖功捷乞加懲究詔下邦政於總督逮問初文華聞蘇寇且滅趣赴蘇欲攘其功比至則邦輔業已先奏捷矣文華遂大怒乃以陶宅寇患委罪邦政叅之復嗾楊宜排邦政宜心知邦政功而重文華意故矛盾若此

總督楊宜言柘林一鎮乃倭奴出入之門爲諸郡要害之地請創立城堡公館調取募兵防守添設把總控制舊有墩臺哨船一併修復事寧設一所摘撥官軍填補兵部議覆從之

倭二百餘人自樂清岐頭登岸流劫黃巖仙居寧海所過焚戮官兵莫能禦其楓樹嶺慈谿領兵主簿畢清見殺賊遂至餘姚由上虞渡曹娥江犯會稽

十一月給事中孫潛言近見趙文華請罷曹邦輔叅稱約與夾攻而邦輔後期及考疏內所列邦輔督僉大猷進剿在九月十一日浙兵次日方進則後期之罪不在直

兵今蘇松士民交口咸稱邦輔實心任事而前流劫畱
都之倭又爲邦輔所滅功能顯然遽請罷斥文華之意
殆不可曉給事中夏棡言浙直官兵會勦陶宅逋寇屢
遭陷敗諸臣奏捷不實且文華欺誑大負簡命會巡按
浙江御史趙孔昭亦以敗聞 上令申飭文華矢心秉
公視事圖效已曹邦輔言川沙窪之賊已集至四十餘
艘而繼至者未已總兵俞大猷把總劉鏜擁兵觀望縱
賊合踪請究其罪 上謂大猷縱寇所宜逮治姑革其
祖職揭黃令軍門責取死罪招殺賊立功別舉代者鏜
革克爲事官管事

時倭二千餘人自海洋駕舟四十餘艘先後入川沙窪與
舊倭合勢登岸沿浦一帶焚劫四圍八竈等處

倭八十餘人駕舟泊海鹽之秦駐山登岸劫掠提督胡宗
憲遣指揮徐行健等率兵禦之賊走入民家拒守官兵
縱火焚之賊悉殘滅

倭五十餘人犯平陽縣由大輿登岸殺協守指揮祈嵩平
陽所百戶劉愍又倭八十餘人犯舟山進屯謝浦叅將
盧鏜遣兵禦之不克指揮閔溶死之

倭寇犯興化府涵頭舖等處平海衛千戶丘珍楊一茂與
戰死之已復犯清海口泉州衛指揮童乾震直奔其壘

國朝典彙卷一百六十九
日本
四十一
斬賊十餘亦被害事聞詔各立祠其地有司春秋祭享
襲陞其子二級

閏十一月提督胡宗憲以倭犯平陽遣守備劉隆率兵禦
之遇賊於三港敗績隆及千戶劉綱百戶張澄俱死
給事中孫濬言防倭諸臣既有巡撫總兵又有總督及督
察重臣事權不一牽制靡定所以迄無成功兵部覆奏
諸臣職守督察主竭忠討寇核實布聞總督主徵集官
兵指授方畧巡撫主督理軍務措置糧餉總兵主設法
教練身親戰陣至於有司責在保安地方固守城隍
上然之命行諸臣各遵勅諭施行

趙文華疏乞還京許之文華初奉命至浙適狼兵調至土
官婦瓦氏等知倭厚蓄銳意請戰文華感之亟趣總督
張經進兵不得則上書痛詆經被逮代經者周琬楊宜
皆庸騫無遠畧由是賊勢益熾及激瓦氏戰亡其卒十
餘人復計攻陶宅遭颶餘倭大敗始知賊未易圖卽有
歸志及十一月川兵破周浦賊兪大猷復有海洋之捷
文華遽言水陸成功江南清宴臣違闕日久請歸供本
職是時海洋回倭泊浦東川沙窪舊巢及嘉定高橋皆
有倭據而新倭來者日衆浙東西破軍殺將羽書沓至
文華乃以寇息聞其欺誑若此

南京給事中朱文漢疏言周浦川沙窪倭賊新舊合夥而
民兵柔脆不足以當黠寇宜仍調客兵剿捕操江重任
宜畱臨淮侯李庭竹供職誠意伯劉世延穉弱不堪重
寄 上詰責兵部曰江防重任何乃漫不擇人李庭竹
可南京掌府仍兼操江如故貸尚書楊博不問奪郎中
宋國華俸一月

三十五年正月福建倭寇流入浙江界與錢倉寇合原在
畱守王倫督容美土司田九霄等兵扼之於曹娥江賊
不得渡還走官軍追及之於三江民舍連戰斬首二百
級復追至黃家山盡殲之

松江新場倭襲敗官軍於四橋叅將尚允紹等死之八其
卒四百餘人

先是三十四年十二月蘇松兵備任環都司李經守備楊
縉率永順保靖土兵追剿新場倭寇時賊衆二千人皆
伏不出而詐令人舉火於數壘外若將引去者保靖土
舍彭翅引軍先入嘗之不見一人於是永順頭目田菑
田豐年等爭入伏起我軍四面爲賊所圍翅等偕所部
俱死之御史邵惟中以聞因言旬月之內酉陽永順兵
再戰再北皆由督撫經畧失宜將領觀望畏怯所致乞
飭總督楊宜與巡撫曹邦輔俾無再悞而究治環及經

縉袞恤翅菑豐年等得旨宜調兵萬餘不能平賊屢
失機宜大負委任姑革回籍閑住邦輔環經俱奪俸戴
罪勦賊翅等各贈一官仍賜以棺具殮

巡按御史周如斗以正月間官軍禦倭於橋事聞因叅
總督楊宜提督曹邦輔輕率寡謀致川兵敗於東溝苗
兵敗於新場東兵胡兵敗於四橋乞將宜罷黜邦輔罰
治陣亡叅將尚允紹指揮李田鮑東萊千戶郭勛崔彥
章李尚節李鼎百戶趙武陳清袞卹疏下兵部叅看

上深以南寇爲憂疑趙文華前言零寇將滅爲不實屢
以問大學士嵩嵩曲爲營解上意終不釋文華聞而

大懼於是謀所以自解者因詭言臣受皇上重托爲
人所嫉近奉命還京臣計零寇指日可滅乃督撫非人
今復一敗塗地皆由吏部尚書李默恨臣前歲劾逮其
同鄉張經思爲報復迨臣繼論曹邦輔則嗾給事夏栻
孫濬媒孽臣及宗憲黨雷邦輔延今半年地方之事大
壞昨浙直總督又不用宗憲而用王誥抵塞然則東南
塗炭何時可解陛下宵旰之憂何時可釋也默因得
罪上隨諭吏兵二部曰南賊一事不宜坐視人臣都
不盡忠文華非告密楊宜已黜仍革去冠帶爲民曹邦
輔令巡按御史逮繫來京問此任便推補王誥不必去

仍令舊職胡宗憲陞兵部左侍郎兼僉都御史代邦輔
後邦輔逮至謫戍邊

三月兵部奉旨覆議九卿科道條陳禦倭事宜一選武將
一任文職一精選練一處兵餉一守要害一明職掌一
明賞罰一論奇功一分信地一計職任一行撫諭近趙
文華言獲降倭奴入寇海賊俱係日本所屬野島小夷
爲中國逋逃所引其王未必知也乞遣官勅朝鮮令其
傳諭日本國王禁戢諸島詔俱如議行

四月倭薄溫州兵使者檄同知黃釗出兵迎擊賊戰敗被
執寇欲還釗索千金爲贖釗罵賊不置賊怒磔殺之事
聞贈叅議廕一子太學生仍爲祠春秋祀之

倭自福清登岸散入內地流劫溫台淮揚常鎮諸府殺掠
焚燬慘不勝言

倭船二十餘艘自浙江觀海登岬攻慈谿破之殺鄉官副
使王賂知府錢渙等大掠而去軍民死者數百人

江北倭流劫至岡山山北等港無爲州同知齊恩率舟師
迎戰敗之斬首百餘級恩長子尚文次子嵩叔仲實弟
寶榮姪慎寅友良大卿孫童俱在行嵩年十八驍勇善
射獨前追賊至安港恩等從之會伏發賊四合圍恩等
及其家丁錢鳳等二十一人力戰皆死之獨嵩慎寅三

人得脫賊乘勝遂至金山殺鎮江千戶沈宗玉王世良
於江中

倭萬餘趨浙江阜林等處遊擊宗禮帥兵九百人禦之於
崇德三里橋三戰俱捷斬首三百餘級賊首徐海等皆
辟易稱神兵會橋陷軍潰禮與鎮撫侯槐何衡忠義官
霍貫道俱死之賊乘勝攻桐鄉不克禮驍勇敢戰所部
箭手三千人皆壯士及是役論者謂兵興以來用寡敵
衆血戰第一功事聞贈禮都督同知謚忠壯廕一子世
指揮僉事槐衡各晉二級貫道贈光祿寺丞任一子知
印出身

時兩浙俱被倭而浙東則慈谿焚殺獨慘餘姚次之浙西
松林乍浦烏鎮阜林皆爲賊巢前後至者二萬餘人巡
按御史趙孔昭以聞詔總督胡宗憲亟圖剿寇方畧各
處調兵巡撫官有畱滯不發者罪之

先是三十四年九月胡宗憲請遣使詔諭日本國王禁戢
島夷并招還通番商犯許立功免罪旣奉諭旨遂以寧
波生員蔣洲陳可願徃至是可願先還言初自定海開
洋爲颶風飄至日本五島遇王直毛海峰等言日本國
亂王與其相俱死諸島夷不相統攝須徧曉諭之乃可
杜其入犯有薩摩洲賊舟未奉諭先已入寇矣我輩習

坐通番禁嚴以窮自絕實非本心誠令中國貸其前罪
得通貢互市願殺賊自效遂畱蔣洲傳諭國王宗憲疏
令本兵議其制馭所宜俾臣等奉以從事下部覆東南
自有倭患以來有言悉販海奸商王直毛海峰等以近
年海禁大嚴謀利不遂故勾引島夷爲寇者有言彼國
遭荒米貴各島小夷迫於饑窘乃糾衆掠食國王不知
者用兵數歲捕獲亦多招報參差茫無可據故昨歲禮
部從撫臣請遣使偵之今使者未及見王乃爲王直等
所說而返其云禁諭各夷不來入犯似乎難保且直等
本我編民旣稱效順立功自當釋兵歸正乃絕不言及
而第求開市通貢隱若夷酋然此其奸未易量也宜令
宗憲等振揚威武嚴加提備仍移文曉諭直等俾剷除
舟山賊巢以自誠其信果海壖清蕩朝廷自有非常恩
賚其互市通貢姑俟蔣洲回日夷情保無他變然後議
之報可

五月倭圍巡撫阮鶚於桐鄉攻城甚急巡按趙孔昭上疏
乞援總督胡宗憲知賊首有麻葉徐海二酋乃飾美妓
二人黃金千兩繒綺數十匹月下舁送徐海而不及麻
葉葉知之疑有異志遂拔砦歸城不得破

胡宗憲遣使至桐鄉諭賊首徐海陳東解圍海聽命歸我

俘二百人東不從復畱一日始退屯乍浦
巡江御史邵惟忠言倭薄通州攻圍未解餘衆自狼山轉
掠瀕江諸郡縣而瓜儀爲畱都門戶鎮常乃漕運咽喉
不可視爲緩圖宜大集客兵嚴勅諸臣協心戮力共靖
其亂下兵部覆言倭自入犯以來未有徧浙之東西淮
之南北如今日者縱使地方多兵而分投防禦不無顧
此失彼之患徵兵應援實不容已日者趙孔昭乞援已
議令徵集海廣土舍永順夷兵併山東河南廣東打手
胡盧等兵六枝俱赴浙直軍門聽用今再議選河南雖
陳及山東八衛兵陝西延綏兵徐沛募兵勅遣才望大
臣一人總督前去以爲犄角保障畱都 上然之

命工部尚書趙文華兼副都御史提督浙直軍務初文華
言殘倭無幾旋當清蕩已而海警屢至因 上屢詰懼
誅乃攻李默誹謗爲脫罪也 上果大悅陞文華尚書
加宮保嵩因薦文華有文學宜供玄機 上不允及是
倭患日甚羽書日夕數至部議遣大臣督兵往援已命
兵部侍郎沈良才矣 上復諭嵩以南地人事物情再
問文華令備細以實對嵩知 上覺其欺詞窮且見譴
乃令文華自以其意請復視師嵩從中爲言良才不勝
任江南人引領俟文華至宜仍遣督察 上乃止良才

令文華往賜勅遣之文華因奏薦文武官知兵可用者
副留守朱仁守備朱廕郎中陳惟舉陳茂禮知州盧孝
達通判黃元恭請悉發自隨與良才所舉何鳳郭仁一
體效用詔可

六月操江史褒善初駐蕪湖聞浙西倭寇突至卽馳往徽
寧避之賊渡江陰過狼山直抵瓜州至楊州無能禦者
給事中張師載論劾褒善癸愞失職上令罷之

廣東倭劫掠潮州等處巡撫譚愷以聞因請以本省兵船
赴浙直軍門者掣還自救部言並海諸省俱係要地宜
令愷與胡宗憲酌議彼中事勢緩急以爲去留不得自
分彼此從之

倭入慈谿初王忬在浙令兩浙諸縣皆築城自固獨慈谿
士人持不可至是倭衆大至知縣柳東伯不知所禦攜
印組走匿倭殘殺人民無算縉紳被禍尤慘始追悔不
城爲失計東伯失守當坐死以無城可守爲民

倭入慈谿省祭官杜槐與父文明率兵追敗於王家團海
道劉起宗因委防守餘姚慈谿定海三縣未幾與賊遇
於白沙一日戰十三合殺賊三十餘人斬其一酋槐數
被創遂墜馬死文明別將兵擊賊於鳴鶴塲斬白眉倭
帥一級從七級生擒二賊賊驚遁呼爲杜將軍旣而復

追賊至奉化楓樹嶺以兵少無繼陷陣沒按臣以聞詔
贈槐光祿丞文明府經歷廕子國子生有司立祠祀之
倭薄海鹽指揮徐行健程祿百戶方存仁逆戰死之事聞
行健贈指揮使任一子百戶祿存仁各贈有差

八月總兵俞大猷大破倭寇於梁莊初趙文華赴浙沿途
徵檄河間山東兵四千人募徐沛兵千人爲前鋒已而
抵鎮江整兵東下諸寇在常州桃花港諸處者聞之皆
解散亡何復聚掠倏忽莫測胡宗憲計無所指議欲招
輯之徐圖掩襲浙江巡按趙孔昭蘇松巡按周如斗不
可因上言寇未一挫撫之徒滋後虞今徵兵四集初氣

正銳當大振軍聲明彰天討勿得輕信寡謀自貽僇辱
上然之諭文華等協謀剿寇尅期蕩平文華仍與宗憲
宣諭徐海等出降而密檄俞大猷督師襲擊破之

初浙西倭寇惟陳東一部最強徐海後至與合鄉鄉之
圍海麾其兵遽退東不得已從之遂與海有隙宗憲知
其情乃乘間說海使爲內應海許諾卽計擒東及其黨
麻葉等百餘人以獻餘賊有入海者引兵追及之沈其
舟無一人得還海旣縛獻陳東等退屯梁莊聽撫進退
未決其部衆仍出營肆掠不止至是官兵四面俱集文
華遂欲乘勝勦海使人責問之海知有變乃阻深塹自

守大猷等督師襲擊於沈庄破之又進薄梁庄會大風縱火諸賊鼓譟從之賊大潰斬獲一千六百餘級倭窮迫皆闔戶從火中相枕籍死海倉卒溺水死引出截其首生獲倭魁辛五郎等餘衆解散浙直稍寧

提督趙文華總督胡宗憲巡撫阮鶚以乍浦捷聞因類奏六月中各哨官兵首功前後共二千餘級兵部覆奏徐海雖稱效順而擁衆自保情狀叵測宜令所司嚴爲之備不得借口投降貽患地方其各處戰功請行巡按御史覈實行賞時浙東仙居浙西桐鄉二大寇畧平其分掠海門者把總張成已敗之江北寇流入鎮常者總兵

徐珏等敗之及蘇松寧紹諸處相繼告捷賊勢日衰矣九月趙文華等奏上八月中梁莊平倭功次因言水陸諸寇相繼蕩平皆上穹默佑聖武布昭非將帥之力能及此兵部覆請錄永保二土司彭蓋臣彭翼南彭明輔彭守忠等及文武將立功仍祭告郊廟社稷以明得意上曰妖氛蕩平仰賴天地洪庇朕心感悅胡宗憲趙文華阮鶚先賜勅獎勸各處調至將兵數多督撫官卽時勘酌散回趙文華命回京

十二月趙文華還京初文華再出督兵所至徵兵集餉浪費不經於是提編徭役加派稅糧截留漕粟扣除京帑

退脇富民脫釋兇醜按括公私金瑤圖畫以百萬計其
爲軍旅之用纔什之一二所徵官士民兵川貴湖廣山
東西河南無不罹患而臨敵不前遣還不去往往潛爲
盜賊行者居者並受其禍雖有梁莊之捷人腹誹之至
是還京而吳越之間如脫距矣

倭俘麻葉陳東等俱械繫至兵部尚書許論等奏請獻俘
從之羣臣俱具服稱賀仍舉謝玄大典論平倭功加趙
文華少保胡宗憲右都御史各任一子錦衣千戶餘陞
賞有差

自梁庄捷後倭賊悉靖惟舟山倭據險結巢官兵環守之
不能克時土狼兵俱已遣歸而川貴兵六千人始至胡
宗憲方畱防春汛隸俞大猷經營舟山之賊會夜大雪
大猷乃督兵四面攻之賊悉銳出敵殺上官莫翁送諸
軍益怒競進賊大敗歸巢官兵積薪草以棕簔捲火擲
之賊四散潰出斬首一百四十餘級餘悉焚死賊遂平
二十六年三月有倭舟七艘自金沙登岸復犯如臯至泰
州轉掠揚州山東及徐州官兵禦之皆潰遂薄新水關
矢及城中又進犯天長都司沃田把總丘君寵禦之皆
敗死賊遂入縣治劫掠已而由石梁趨盱眙復攻入之
遂突犯泗州攻城不克分衆犯清河攻入縣治縱火焚

掠而去遂侵淮安入安東焚劫
江北倭至揚州營於灣頭鎮數日遂犯高郵入寶應信宿
而去突犯淮安掠船四十餘艘旋復入寶應燒燬官民
廨舍掘縣北土壩泄上河水入乃駕舟遡東鄉由鹽城
至廟灣入海居數日開洋東遡
六月淮揚兵備副使于德昌等督兵擊倭賊於東鄉德昌
督水陸兵叅將劉顯率苗兵直前衝賊親斬其渠首賊
衆披靡諸軍鼓譟繼進賊走登舟我水陸兵夾擊之斬
首百餘多焚溺死者餘衆退泊雲梯關尋去刀門港遁
南京科道等官劉堯誨言倭寇攻掠揚州高郵勢且侵及
天長六合去留都不數舍夫淮揚爲運道要衝則當爲
國家血脈之慮留都係陵寢所在則當爲國家根本之
圖惟 陛下速勅諸臣刻期剿滅仍重究叅將黑孟陽
等以嚴失事之罰 上以爲然命南京撫按官及各督
撫諸臣亟調兵驅勦不得怠緩仍擬黑孟陽死罪革把
總韓德須備倭王表職俱令立功自贖
八月先是總督胡宗憲奏差生員蔣洲陳可願諭各島至
豐後阻留轉令使僧前往山口等島宣諭禁戢至是山
口都督源義長具咨送回被虜人口豐後太守源義鎮
遣僧德陽等具方物奉表請罪請頒勘合修貢復送洲

還遣僧清授附舟前來言前後侵犯皆中國奸商潛引小島夷衆義鎮等初不知也於是宗憲數陳其事言洲奉使宣諭日本已歷二年乃所宣諭止及豐後山口豐後雖有進貢方物而無印信勘合山口雖有金印回文而又非國王名稱是洲不諳國體罪無所追但義長等既以進貢爲名又送還被虜人口真有畏罪乞恩之意宜量犒其使以禮遣回令其傳諭義鎮義長轉諭日本國王將倡亂各倭立法鈐制勾引內寇一併縛獻始見忠款方許請貢疏下禮部言來使宜優賚遣回如宗憲議其宣諭一節事關國體未可輕易詔仍詳議具奏部

臣乃請令浙江布政司以有司之意移咨風示義鎮等轉諭其王餘如宗憲議報可

十一月胡宗憲以擒獲海寇王直等來聞直與王澈葉宗瀾謝和王清溪等共一其衆屯五島自保宗憲與直同鄉習知其人欲以招之乃迎直母與其子入杭厚撫犒之而奏遣生員蔣洲等持其母與子書往諭以意謂直等來悉釋前罪不問且寬海禁許東夷市直等大喜奉命卽傳諭各島如山口豐後等島主源義鎮等亦大喜乃裝巨舟遣夷目善妙等四十餘人隨直等來貢市以十月初至舟山之岑港泊焉是時浙東西傷於倭聞直

等以倭船大至則甚競言其不便巡按王本固奏直等
意未可測納之恐招侮於是朝議闕然謂宗憲且釀東
南大禍而浙中文武將吏亦陰持兩可直既至覺情狀
有異乃先遣激見宗憲問曰吾等奉詔而來將以息兵
安邦謂宜信使遠迓而宴賜交至也今兵陳儼然卽販
蕩小舟無一達島者公其給我乎宗憲委曲諭以國禁
固爾誓無他心激以爲信而夷目善妙等見副總兵盧
鏜於山鏜誘使縛直等直大疑畏宗憲百凡說之終不
信曰果不欺遣激出吾當入見耳宗憲卽遣之直黨仍
要中國一官爲質於是以指揮夏正往直與宗滿清溪
來見宗憲好言慰之令繫按察司獄具以狀聞請顯戮
直等正國法始准義長等貢市永銷海患或曲貸直等
死克沿海戍卒用繫番夷心俾經營自贖本固聞於事
機力以爲未可而江南人詢詢言宗憲入直善妙等金
銀數十萬爲求通市貸死宗憲聞而大懼䟽卽遣追還
之盡易其詞言直等實海氛禍首罪在不赦今幸自來
送死實籍玄庇臣等當督率兵將殄滅餘黨直等惟廟
堂處分之時直等三人來畱激謝和在舟本固復言諸
奸逆意叵測請嚴勅宗憲相機審處務令罪人盡得夷
不爲變於是嚴旨責宗憲擒剿宗憲乃大集兵艦環夷

舟守之夷挾貨無所售既索直等不出見兵船逼之益
急乃揚言責中國渝約數出怨懟語移舟據舟山爲固
宗憲仍以好言挑之令盡縛送中國人將與善妙等爲
市夷已狎知誑之然冀倖萬一彼此以危言相支調云
初直泊岑港宗憲欲戰慮不勝乃力主撫議檄總兵盧
鏜往來直舟爲盟甚堅直來官以都督署司海上通互
市直亦自奮言能肅清海波遂與葉碧川等挺身來見
宗憲以賓禮遇之使指揮某爲館主給輿夫肩輿出入
復出薪米肉酒供餽其舟人日費百餘金且交質爲信
保無他虞宗憲以狀上然不敢悉其故既而 上謂直

元克不可赦命棄市宗憲得旨大媿沮然不獲已矣密
檄按察使收直繫臬司獄且諭令少緩恐急則激之去
然其實欲陰逸直顧前盟也而將歸責於按察使按察
覺之乃急收直竟服上刑宗憲復以爲功謂前招納爲
秘計非本心也朝廷信之加宗憲太子太保餘陞賞有
差然直雖就誅而三千人無所歸益恚恨謂我不足信
撫之不復來矣日散掠閩越淮揚間爲禍更慘

三十七年二月倭犯潮州之鮑浦攻蓬州千戶所僉事萬
仲分部水陸兵馬東西哨攻之臨敵而哨兵皆潰領哨

十一月魏士音共具死

倭犯福州巡撫阮鶚不能禦取庫銀數萬兩及改機數百
疋金花牙轎賂之以新造大舟六艘俾載而去

四月倭寇二十四艘約數千人掠臨海之三石鎮總督胡
宗憲驅走之

倭千餘攻惠安知縣林咸率丁壯乘城禦之倭攻五晝夜
不克丁壯死者數百人倭亦頗有損失乃引去

倭攻福清破之執知縣葉宗文劫庫獄殺虜男婦千餘縱
火焚官民廨舍舉人陳見率家僮禦賊不克與訓導鄔
中涵同被執罵賊而死

五月福建倭結艘自海口出港叅將尹鳳督武舉楊承業
等引舟師擊之衝沈賊舟七斬首六十八級生擒七人
餘舟敗遯鳳等追至東洛外洋及七礁白大棕衣大洋
等處斬首百有餘級生擒千有六人銳傷及溺水死者
甚衆福興患由是少熄

惠安知縣林咸率兵攻倭於縣境之鴨山乘勝追奔陷賊
伏中死之

六月倭寇分犯同安長樂漳泉諸處攻福清南安二縣破
之巡按御史樊獻科以聞 上命趣巡撫王詢赴任集
兵追勦殲於海口在漳泉者亦創殘遁去已而敘功革
叅將黎鵬舉職克爲事官奪守巡官叅政萬衣副使邵

梟等俸俱戴罪殺賊下福清知縣黃文宗南安知縣涂
光裕於御史問

七月以浙江岑港海寇未平詔奪總兵俞大猷叅將戚繼
光把總劉英職期一月蕩平如過限無功各逮繫至京
問并奪兵備副使陳元琦曹金俸令總督胡宗憲督之
剿賊若失事者連坐初胡宗憲遣還毛海峰誘降王直
及至直下獄海峰遂絕與倭目善妙等五百餘人燒船
登岸列柵舟山阻岑港而守官軍四面圍之雖頗有斬
獲然海中數苦毒霧賊憑高死鬪我兵莫利登先多陷
沒者是時新倭大至朝議慮其先後合爲害將大屢下
嚴旨趣宗憲督諸將及時平賊宗憲懼得罪乃上疏後
言陸戰功謂賊雖未殄可期月而獲於是科部極言其
欺誕并劾失事諸臣乃有是命

十月岑港倭移巢柯梅總督胡宗憲屢督兵討之不能克
於是御史李珣追劾宗憲私誘王直啟釁御史王本固
南京給事中劉堯誨亦劾其老師縱寇濫叨功賞請行
追奪堯誨又言前淮揚之變知府石茂華劉崇文等嬰
城自保顧得援軍之力却賊冒賞御史馬斯臧僞增功
次亦當並治兵部覆請切責宗憲而令查盤科道羅嘉
賓龐尚鵬并勘斯臧等事 上曰宗憲軍務重寄宜去

與雷其令廷臣集議母黨護依違斯臧等本兵旣據擬賞矣如何又勘其并議上於是成國公朱希忠等吏部尚書吳鵬等議言宗憲功多當切責雷用如部議斯臧等事已前決當置勿問如上旨上手答曰妖賊直罪浮臧富本宗憲用計誘獲人皆知者小人嫉功會彼奏上玄瑞遂爾有言朕覽諸疏付之丞弼議擬用存公論耳是豈不分是非不明功罪宗憲其仍舊用心乎臧以副簡眷未幾宗憲疏辯言王直爲東南大患節經兵部題奉欽依先有曉求之文後有許降之議臣仰承廟算不惜身家百計以圖之茲幸擒獲言者乃誣臣爲私誘詆臣爲專擅又以今歲繼來之寇謂由臣擒直啟釁致之是將嫁無窮之禍於任事者之身昔歲臣任巡按時徐海陳東麻葉之徒已盤據松江結巢柘林攻城破邑者四年矣王直黨果何人招致何人啟釁乎矧直猶譎善戰久雄海上昔年以孤舟駐泊列表兪大猷時爲叅將以福船五十艘攻圍數月竟爾逸去以此觀之此非可以力勝非可以常視之也方直跳梁海洋中外驚詫以爲猛虎毒蛇不啻丘富臣若辛積慮幸而獲之乃言者復以么麼視之夫直誠么麼與海上事無輕重也不足爲臣功已矣而又安得爲臣大罪耶臣力竭智殫

國朝典彙卷二百六十九
三十八
怨多毀集願畢力以除舟山餘孽退伏斧鉞唯聖明裁
察 上復報曰卿計獲妖賊人所皆曉特以獻瑞故人
不敢直指引軍事以害卿宜竭誠展布以平餘氛不允
辭

二十八年正月胡宗憲以倭患未弭春汛伊邇請募山東
民兵三千選委謀勇將官督駐蘇松常鎮防守兵部覆
議從之

廣東原屯黃岡倭流劫海陽饒平潮陽惠來等處

浙江永嘉良醫王沛招集鄉兵斬倭戰於梅嶺死之
宗憲以聞詔贈太僕寺丞立祠廕一子

二月廣東流倭突犯福建詔安官兵禦之賊引衆犯漳浦

三月倭犯浙江自象山河家礮金井等處焚舟登岸海道

副使譚綸引兵與賊戰於馬崗敗之斬首七十七級

總督胡宗憲言舟山殘孽移住柯梅卽其焚巢夜徙力已

窮感小船浮海勢易成擒而總兵俞大猷叅將黎鵬舉

防禦不密邀擊不力縱之南奔播害閩廣失機殃民宜

加重治 上命逮繫大猷鵬舉來京訊治柯梅倭之造

舟開洋也宗憲實陰遣之故不令諸將邀擊及倭旣出

舟山卽駕帆南泛泊於浯嶼焚掠居民由是福建人大

譟謂宗憲嫁禍南道御史李瑚遂訐叅宗憲數其三大

罪瑚與大猷皆福建人宗憲疑大猷漏言於瑚故誘罪
大猷以自掩飾如此

倭犯江 南崇明縣治泊舟三沙登岸焚劫

四月江北倭趨通州總兵鄧成遣兵禦之敗指揮張容被
殺倭進據白浦鎮

初倭僧清授隨侍郎楊宜所遣鄭舜臣至寧波未幾總督
胡宗憲所遣生員蔣洲復以僧德陽至俱上書求貢市
朝議未允令量賞遣歸未行而王直就擒宗憲疏言倭
情可見不必遣還然晉之浙西非宜請用洪武間例發
四川各寺安置兵部議從之

時江北兵備劉景韶以遊擊丘陞等擊原駐白浦倭於丁
堰如臯海安三戰皆捷斬首百餘賊乃進掠通州謀犯
揚州景韶復督陞等以火攻其老營擊敗之斬首八十
級焚死一百七十九人賊奔入潘家庄盡銳攻之斬首
一百二十八級初自南沙登岸犯通州之倭至是剿絕
廟灣倭又合衆來攻淮安叅將曹克新禦之戰於姚家蕩
自寅至申賊大敗斬首四百七十八級賊遁入姚庄我
兵縱火焚庄死者二百七十餘徒餘賊奔陣莊我兵追
斬七十四級賊乃退入廟灣拒守

劉景韶督兵擊倭於印莊斬首四十五級賊西走次日我

兵復與戰於新州斬首七十八級賊新河口遯入民庄
我兵以火攻之凡再戰斬首二百六十級餘賊悉焚死
無一人脫者是時江北流劫之倭悉殄惟廟灣大夥據
險固守不出水陸兵環其四面攻之

福建新倭大至且多賫攻具先攻福寧連江羅源等處流
劫各鄉遂攻福州府城經旬不克乃移攻福安破之叅
將黎鵬舉以舟師擊倭於海中七星山屏風嶼斬首六
十七級生擒六十八人時沿海若長樂福清等境悉有
倭舟廣東流倭往來詔安漳浦間浙江前歲舟山倭移
舟南來者尚屯浯嶼加之新冠徧福漳泉無地非倭矣

五月江北兵攻倭於廟灣衝其巢斬首四千餘級我兵死
傷過當復退守之時賊守甚固巡撫李遂以我兵鼓戰
而疲宜圍困之賊日久無食且水陸斷其行道可收全
勝通政唐順之以爲玩寇乃自環甲持矛麾兵以避屢
挑戰賊終不出遂督兵入險賊奮銳東西衝我兵擁進
彼此皆傷然賊復稍稍出掠覓舟探道爲走計矣順之
自知失計以爲賊未可平乃駕言經畧三沙倭南去
福建倭屯浯嶼經年乃前舟山寇隨王直至岑港者也至
是開洋去其毛海峰者復移衆南畧建屋而店

倭寇二十餘艘屯崇明縣三川沙總督胡宗憲檄總兵盧

鐘帥師攻破之前後斬首一百餘級寇遁去宗憲以捷聞賜賚有差兼言通政唐順之贊畫功已而擢僉都御史未幾卒於官

倭圍廟灣日久副使劉景韶督卒填壕塹嚴兵逼壘而陣賊終不出乃令水兵載葦焚其舟復水陸進擊倭潛遁入舟官兵進據其巢追奔至瑕子港斬獲頗多餘倭無幾不復能戰乘風開洋而去

福建永福倭舟出梅花洋叅將尹鳳等以舟師分擊之斬百餘級生擒九人既而倭復回舟泊澳頭未幾復遁鳳復以水兵追擊於橫山斬獲甚衆

七月原屯三沙倭賊突犯江北由海門縣七星港登岸流劫過金沙西亭將犯揚州叅將丘陞併力禦之戰於鄧家庄賊敗走仲家園復追至鍋團陞輕騎先追賊覘無後繼盡銳來衝陞馬蹶被殺已而官軍大至賊懼奔逸宗憲以聞贈都督同知廕一子世襲

八月江北倭自鄧家庄敗後沿海覓舟不得我兵尾之於劉家橋白駒沙等處寇餒甚奔庄我兵圍之時劉顯兵至江北兵令顯先登各營繼進縱火衝擊自辰至酉巢破斬二百十四級賊奔白駒沙我兵追擊又敗之於七灶茅花墩共斬首四百餘級盡殄焉

三十九年二月倭寇六千餘人流劫潮州等處告急兵部
言閩廣二省俱鄰南海倭奴侵軼廣中皆以閩人爲嚮
導今其勢張甚在兩廣固當尅期誅勦在福建撫臣亦
難辭縱賊貽患責請令巡按御史通核功罪以聞報可
三月給事中王文炳言邇者浙直倭患稍寧而閩廣警報
踵至蘇松淮揚間傳徒悍卒所在騷騷宜勅下本兵議
所以安民蓄兵絕寇之策部議安民之策莫若去不急
之務捐無名之征重懲貪官酷吏蓄兵之策莫若訓練
各處鄉兵至隸籍行伍者則責之軍衛募自民間者則
責之有司絕寇之策宜令沿海有司按籍所部居民有
與盜賊通者許同里首告卽置之法仍追所犯銀三十
兩給賞告者又有無賴惡少竄入軍中巧立報効贊畫
名色平居坐糜公廩有事爭冒首功此輩亦將來禍本
宜一切禁革 上皆納之

五月加胡宗憲兵部尚書兼右都御史仍督沿海軍務初
南京御史李瑚劾宗憲邀功致寇下兵部議詳覆上不
問已而閩廣浙圻倭寇日熾福建巡撫樊獻科請趣宗
憲赴閩應援浙江巡按周斯盛請勅兵部趣宗憲督師
勦寇以弭海患宗憲聞命泄泄如故已而寇稍解散竟
以功進官沿海撫巡諸官悉聽節制其體統如三邊而

勳臣總兵亦由掖門通謁庭拜下風矣

四十一年十二月倭陷福建永寧衛大掠數日而去三月復攻永寧城陷之大殺城中軍民焚燬房屋幾盡

倭犯懷安縣提督都御史游震得檄兵剿之時坐營指揮王毫帥三衛軍福州府通判彭登瀛帥鄉兵先嘗賊失利歸罪於毫震得執毫笞之斬隊長以下四人三衛軍不服有怨言會副使汪道昆閱操教場遂大譟格殺鄉兵數人求殺登瀛不得屯城南久之乃散

四十二年十月倭犯福建其自浙之溫州來者合福寧連江登岸海賊攻陷壽寧政和寧德等縣自廣之南嶼來者合福清長樂登岸海賊攻陷玄鍾所蔓延及於龍巖松溪大田古田之境無非賊者

初浙江叅將戚繼光等既連破賊於林墩港等處聞之宿寇盡平繼光引兵還浙遇倭自福清東營嶼登岸麾兵擊之斬首百八十有奇遂行而寇倭至者日衆始犯邵武殺指揮齊天祥轉掠羅源連江等縣殺遊擊倪祿遂攻玄鍾所城及寧德縣入之乘勝直抵興化府城不克乃合兵薄城下圍之且匝月巡撫游震得以狀聞部

覆賊以旬月內連破數城如入無人之境帥府而下職
守謂何顧事急之際姑令戴罪立功請調新募義烏兵
一枝以戚繼光統之仍起丁憂叅將譚綸與都督劉顯
總兵俞大猷同心共濟以收奇功上從之
十一月都督劉顯率兵應援興化初顯大兵留江西剿廣
寇所提入閩卒不及七百人且疲屢戰倭新至勢衆且
銳顯知不敵乃去府城三十里隔一江按兵不進至是
欲掩逗留之罪始遣五卒賫文詣府約欲率兵赴城禦
敵賊獲五卒殺之用其職銜僞爲顯文約某日夜某時
分率兵潛入應援城中勿舉火作聲恐賊驚覺擇奸細
五人詐爲劉卒賫入時叅將畢高叅政翁時器在城信
之至期賊冒劉兵入城人莫之疑賊既入忽備殺人
城中驚亂畢高翁時器及衛掌印指揮徐將等皆倉皇
縋城走城遂陷同知吳世亮爲賊所殺賊遂據城中三
閱月殺擄劫掠焚燬慘毒備極劉顯乘亂擄執城中逃
出婦女時有閑住叅政王鳳靈繼妻年少竟爲劉顯擄
去賊旣飽其欲始如平海衛欲擄船泛海去
十二月興化倭結巢崎頭城與都指揮歐陽深相拒久之
不出深望見其兵少輕之直前挑戰伏發深與其下數
百人皆戰死賊乘勝攻陷平海衛

以倭陷興化命提督兩廣都御史張臬總督廣閩軍務調
兵馬分部擊之罷巡撫游震得回籍聽勘令總兵劉顯
戴罪剿賊逮叅政翁時器叅將畢高至京問罪初興化
敗書聞震得已坐失事奪俸既而巡按御史李邦珍言
震得一籌莫展宜簡命大臣有濟變才者假以重權亟
往拯之南京科道范宗吳張士佩等亦言賊薄興化時
震得詐疾告休及城陷則避之福清不肯督兵救援顯
屯軍江口遠在三十里外駐營未聞提兵決戰而時器
與高聞變卽縋城宵遁尚未識其所往請各寘之理俱
下兵部議覆大臣有威望累著擒賊功者一時無如臬
賢宜重用之震得等誠駑怯有罪但顯素得士心臨敵
易將恐一時難其代者宜令立功自贖俟事寧併論
上然之乃有是命

平海倭引兵出海把總許潮光以輕舟抄之斬首四十九
級賊乃進焚其舟還屯平海

副總兵戚繼光督浙兵至福建與總兵劉顯俞大猷夾攻
原犯興化倭賊於平海衛大破平之斬首二千二百餘
級火焚刃傷及墮崖溺水死者無算縱所掠男婦三千
餘人獲得衛所印十五顆自是福州以南諸寇悉平

故海寇王直餘黨洪迪珍降伏誅迪珍漳州人初與直通

國朝典彙卷一百九
番後直敗其部下殘倭乃依廸珍往來南畧間懼官軍
誅之聲言聽撫而剽掠如故至是勢窮率其子文宗自
詣福建海道副使邵梗所願立功自效總督張臬收下
獄馳疏以聞詔卽其地斬之

四十二年二月時舊倭萬餘攻仙遊城圍之三月戚繼光
引兵馳赴之大戰城下賊敗趨同安繼光麾兵追至王
倉坪斬首數百級餘衆奔漳浦之蔡丕嶺繼光督各哨
兵入賊巢擒斬數百人閩寇悉平殘寇得脫者流入廣
東界掠魚舟入海

三月歸善盜溫七伍端作亂總督張臬檄叅將謝勅討之
勅不爲備爲盜所乘殺指揮王佐等勅懼逃歸原衛未
幾溫七兵亦敗被擒端自縛至軍門求殺賊自効端卽
所謂花腰封也總兵吳繼爵俞大猷受其降提督吳桂
芳至因使擊賊官軍繼之圍倭於鄒塘連克三巢焚斬
四百餘人捷聞 上命各加賞賚

隆慶二年倭分道犯廣東化州石城縣攻破錦囊所殺千
戶黃隆又陷神電縣城一時吳川陽江高州海豐等並
遭焚劫而山寇黃朝太等復起勢甚猖獗官兵不能禦
提督軍務侍郎殷正茂以聞自劾待罪兵部以正茂初
至任宜赦勿問 上曰廣東舊賊未至新倭復熾至陷

城池皆守臣向來怠廢玩愒守禦無策所致罪不可宥
通候事寧核治殷正茂素有才畧茲初任事其督率將
領司道等官悉力驅剿務期蕩滅其地方機宜悉聽破
格整理敢有梗撓者奏聞重治

廣東倭入犯新寧高平等處官兵與戰於外村島嶼皆捷
俘斬二百餘人焚溺死甚衆事聞詔下御史覈功具奏
兩廣總督殷正茂奏撫民許瑞出兵攻剿倭寇生擒七十
八人斬首二十五級請授把總職銜以示優異兵部

廣盜未靖姑厚其賞令盡剿諸賊乃併授官 上命

部議

享和獎

